

Kerweredd `99

Inleiding

*Griß Gott, ehr Leit,
wie geht´s eich dann heit?
Ach, was froh ichen das?
Ich siehns doch, ehr hon Spass!*

*Also ich muss eich sahn, am Ohfang ware mer schwer enttäuscht.
Mer hon uns ball enner abgekeucht!
Bis mer Theme hatte, fer unser Kerwered se schreiwe,
ei do häsche kenne laut Scheiße kreische!
Was war dann met eich los?
Ehr hon jo nix iwwer eich kumme geloss!*

*Awer heit, do kenne mer lache.
Es sin jo dann doch bassert, so manche Sache.
Gott sei Dank kann ich do nor sahn,
sunsch ded ich do howwe stehn un hätt nix vorsetrahn.
Es sin widder Kanone debei das Johr.
Ehr wisse jo, wann mer so was rauskrien, dann sinner verlor.*

*Die Worte Gnade odder Erbarme,.....noch nie gehert.
Dodefor sin veel so schöne Sache bassert.
Glawens mer, ehr werre eich amesehre.
Also misse ner GUT uf das Geschrewwene here.*

*Lauschd meinen Worten, spitzt euer Ohr,
denn jetz les ich unser schäni Kerwered vor.*

Reerer Schneemänner

Do im Räumche do dun se als hocke,
 wenns drauß schneet, so rischdisch digge Flocke.
 Sie sitze im Warme unn dringe är Bier ganz brav,
 wie sich daß fer reerer gehert
 Unn dodebei wärre se jo net gäre gestert.
 De Bagger guckt zum Fenschter naus, oje
 "Ob mei Audo noch fahd in däm diefe Schnee"
 De Peter mäht: "Das fährt noch, is doch klar! Komm mer drinke noch e paar!"

Unn während se so fleißisch drinke,
 dun drauß millionen vunn Flogge uff de Bode sinke.
 E paar Jackys späder hot sich de Wendling dezu entschloss,
 enuffer se fahre an de Jungewald mit seim Geschoss.
 "Eich wärr ichs mit meim Porsche bewaise,
 eier Golfs die sinn doch nur scheiße!"
 Die Blamasch losse die annere zwä net uff sich sitze,
 unn schunn sieht mer das Geschpann an de Jungewald flitze.

De Porsche vorraus die Golfs hinnerher,
 wär jo schlimm wenns annerschder rum wär.
 An de Abfahrt zum Jungewald ohkumm,
 de Wendling loßt die Golfs vorbei: "Die mache mär de wäg frei!"
 De Bagger vorraus de Peter hinneno unn beide denke:
 "Dämm wärre mers zeiche, wie mär unser Golfs durch de diefe Schnee lenge!"
 Uff ämol e dumpfer schlach unn de Peter brems
 "Honn ich jetzt soviel getrunk,
 odder is de Bagger awei im Schnee vesunk?"
 Vunn unne kummt de Wendling ogeschoss
 bisser muss zügele sei hungrisches Roß.

De Bagger krawwelt ausem Audo unn saht: "Hosche gesieh wie ich bin geritscht!
 Mär hedde eher im Reimche noch äner gepitscht!"
 Sie ziehe an de Audos: "So e Scheiße, das muß doch gehe,
 trotz daß mer Stecke bis zum Dach in derer Schneewehe."
 Es Audo beweht sich kä Millimeter net ums verregge,
 es scheint wohl doch ziemlich dief drinsestege.

*Sie hons uffgebb, jetzt stehn se do drowwe unn fräre,
unn iwwerlehe, wie se kände die Situation noch kläre.
De Peter nadärlisch so schlau wie eh und je
"Ei mer lehn die Fußmatt unner de Räf in de Schnee."*

*Gesagt getan, ein Mann ein Wort.
Irschendwie müsse mer uns jo befreie vunn däm schwierische Ort.
Eninn in die Karre uns Gas durchgetret.
Doch die Fußmatt hott abgehob wie e Raket.
Es Audo hot sich allerdings net beweht
sondern bloß störrisch mit de Räf dorchgedreht.
De Wendling mähnt: "Ich honn e Porsche,
jetzt müsse ner mo alle uff mich horsche.
Ich binne e Säl an mei silwerner Wolf
unn zieh Dich raus mit deem raulische Golf."*

*Hut ab, er hots wärklisch gepackt
Unn hot die hart Nuß geknackt.*

*Sie sinn fröhlich ins Reimche serickgekehrt
Unn honn sich dort noch e schänie Nacht beschert.*

*Die Musik schbeelt dänne "Schneemänner" zur ehr
Wenn doch so e Schneewehe nor net so dief wär.*

Nohkerb-Tour '98

*Daß die Reerer gäre Reise,
kunnde mär schunn in friere Kerweredde bewaise.
Vorsjojr wars, in de Summerzeit,
es war subber Wädde, fascht wie heit.
An de Nohkerb, do ziehts unser Leid als fort,
irschendo hie, an e annerer Ort.
Met Zält, Esse, Geld unn Bier is doch klar,
sinse e nuffer Richtung Nürburschring gefahr.*

*Gäss, getrunck, gesung unn gelacht
Sie honn sich do drowwe emol e schönes Wochenende gemacht.
Es Bier war naderlich a debei unn is geloff,
zusamme honn se fascht soveel wie do unne die am Ständche gesoff.
(Ja, daß künne mer a, do brauche när jetzt garnet so Dumm se gucke,
awwer jetzt ded ich saa, daßner eier Geträng mo nunnerschlugge!
So, genuch gehetzt, nau muß ich mache, daß ich daß färdlich läß
Sunscht träde mär wann ich runnerkumme noch e paar ins Gesäß.)
Ok, wo war ich ... ah...mer honn also schunn ebbes gesoff.*

*Doch wie dem auch sei,
es schänschde Wochenende geht amol vorbei.
Die Karawane hot sich Richtung Heimat in Beweschung gesetzt,
schää gemietlich, es hot käner gehetzt.
Die erschde 10 Kilomeder hot alles geklappt,
bis mär het künne mäne, em Eicher sei Golf het uff de Schdroß feschtgebappt.
"Ich wäs net, wo mei PS uff ämol sinn hiegefloh,
jedenfalls sinnse nimmi do."*

*Me wie 40 krien ich nimmi druff,
wann ich mich mim Fuß abstubbe, kumm ich vielleicht noch dänne Bersch enuff
Ich wäs net was es is, die ganz Zeit is geloff wie geleckt,
hoffentlich is jetzt net mei Modor verreckt.
Uff de negschde Parkplatz isser noch kumm,
unn hot somit schunn änie vunn einische Hürde genumm.
Dort honse geschdann unn honn iwwerleht,
wie mache mers jetzt, daß der Golf widder geht?*

*De Modor wars net, das war de Experde klar,
 daß de Kat kabutt is, hot ne dann de Eicher gesah.
 Soo wars dann a, es Rohr hinnerm Kat war verstoppt,
 unn so honnse wie die Wilde am Rohr rummgeklobbt.
 Es hot nix brung mit erm geklobbe,
 "Ich glaab mer müsse das ganze Rohr abrobbe!"
 Doch wie mache mär das, daß ist die Frage,
 doch äner hot immer e Idee in so rär schwierische Lage.*

*Am Ring hommer jo ziemlich veel getränge in de Mahe gelenkt,
 unn honn anschließend die leere Kaschde unn Fässier in de Kofferraum versenkt
 "Die künnde mär doch aus erm Veschdeck logge,
 unn dodemit de Golf hinne uffbocke!?"
 Links e Kaschde Cola, rechts e Faß Bier, dann wolle mär mol sie,
 wanns so net geht, kriemer die Karre nimmi hie.
 Jetzt hots Audo do geschdann, hinne hochgebockt,
 daß hot die Blicke vunn vorbeifahrende Audofahrer gelockt.*

*E bissje Veluscht vunn Benzin war net se vemeide,
 doch daß hadde mer glei,
 weils Manu hot jo näwer ärer Findy a immer e Hundeschüssel debei.
 Uffm Parkplatz hommer dann gehockt unn honn unser Nummerschild getarnt,
 daß mer aus Kusel sinn hat mär hoffendlich nur geahnt.
 Dann honnse mit drei Mann am Auspuff gezoh,
 wie der abgeriss is, sinse negschd uff die Wiss gefloh.
 Das Probläm iss gelöst,...honnse gedenkt,
 unn honn die Audos uff die Audobahn gelenkt.
 Uff de Audobahn Bärsch nunner is de Eicher an Mercedes unn BMW vorbei ohne
 Probleme,
 dodefor muschdär sich Bersch nuffer widder schäme.*

*Noh e paarmol halle unn an de Auspuff schlah,
 hots de Eicher gepackt unn is langsam awwer sicher hämgefah.*

*Die Musik schbeelt demm Borsch zur Ehr,
 wenn doch so e scheiß Kat net wär!*

(Musik)

*Doch äns muß ich noch sah. Ä Rekord hot de Eicher gebroch,
 vumm Nürburschring noh Roth wärer schneller häm gekroch!*

Delefon-Killer

*In Roth gebts nur noch e paar Baureleit,
met erm Agger, erm Hof unn erm Vieh uff de Weit.
Mär därf jo garnet iwwer se hetze,
es Mühl unn es Brot kunnt a bis jetzt noch kä Gen ersetze.
Bis awwer so ebbes uffm Disch steht, is jedem klar,
daß das drauß uffem Feld e haufe Awed war.*

*Do hinnermer, unn vielleicht noch e Schdick nuffer, uff de anner Schdroßeseit do
wohnt so e Mann,
der außer sei Feld beblanse noch was ganz anneres kann.
Am Selbersch wars, do guckt mer als Reerer jo alsemol niwwer,
is der gude Mann met seim Bulldog iwwer de Agger driwwer.
Ich wäiß net genau wasser gemach hot, ich glaab gepflügt odder wie mer san
gezackert,
uff jeden Fall hot der sich uff seim Bulldog ganz schää äner abgeraggert.
Es Wädde war schää, der Mann war froh,
bloß de Wind hoddem e bissje um die Ohre gezoh.
Daß is awwer egal, das brauch eich jo net se intressere,
was dann bassert is, wolle ner jo beschdimmt here.*

*Uff ämol hot de Bulldog geruckt,
unn sei Fahrer iss am ganze Körper sammegezuckt.
Was war dann das? Doch hoffentlich bloß e Schdää.
Wie ich no vorre geguckt honn, hot doch gar käner do gelääh!
Ich muß emol guggle, was do hot an mer gezoh.
Hoffentlich honn ich mer am Bulldog nix veboh.
E runner vumm Bulldog unn geguckt wasser hot veboggt,
wierers gesieh hot warer ganz geschockt.
Was issen daß? E schwarzer Rähworm? Näh, e diggi Schlang?
Ich trau mich jo garnet neher se gehe
daß Vieh kännt sich jo noch bewehe.*

*E Schlang, daß kann net sinn,
so veel ich wäiß, sin in Schlange kä Kupperdräht drin.
So e Schlang wense dot is schdeht a net so e nuff,
unn uff eerer Haut hot se glawisch kä so klääne, weiße Delefonheerer druff.*

*Ach du scheiße, jetzt wäs ich was es is,
ich honn de Reerer er Delefonleitung veriss.
Jetzt muß ich häm unn muß es schnell melle,
sunschd fange die Reerer mit mer noch o se schelle.*

*Uff seine Bulldog unn de Bärsch e nunner geschoss,
so hodder das gefährlich Vieh hinner sich geloss.
Am Delefonherer hotder gehorscht alser ne hot vunn de Gawwel genumm,
doch die Fraa, die immer macht TUUUUUUT die is äfach net kumm.*

*Was mach ichen jetzt, nau honn ichs gepackt,
unn honn a mei letschdi Vebindung zu de Außewelt gekappt.
Er is do rummgerennt unn war am Schluß ganz schää miet,
doch irschendwo hat er dann doch noch Oschluß kried.
"Tach Poschdbäcker" so hodder sich in de Steuerungsschdell gemeld,
unser tapferer Delefonheld.
Dort wurde ihm auch gleich geholfen, aus derer Situation.
E bissje mulmisch warem dann awwer schon.*

*Die Leit vunn de Telekom sinn kumm unn honns Gericht,
obs geschdimmt hot, is widder e annerie Geschichd.*

*Die Musik schbeelt em Poschder zur Ehr,
wenn mei Agger doch net iwwer deerer Delefonleitung wär.*

Renschwein Rudi Rüssel

*Wann ich iwwer die Kreizung gehe, do niwwer in das große Haus,
seih ich, daß in de Thek leit immer Fläsch unn Worscht in alle Forme unn Farwe
aus.*

*Doch daß die Worscht in de Thek leit, müsse mer Reerer beachte,
muß de Lui unn de Reiner ehrer Awet nohgehe unn die äh odder anner Wutz
schlachde.*

*So e bissje Schlachde, daß is jo kä Sach.
Doch die Wutze hedde sich liewer noch e schänie Nacht
mem e gut gebaude Ewwer gemacht.*

*De Lui hot sich änes Daches beim e Bauer e Wutz besorschd,
unn hot sich uff de Hiefahrt schunn iwwerleht:
"Wenn ich die Wutz geschlacht honn,
gebts diesmo beschdimmt e subber Worscht."
Beim Bauer ohkumm hot der die schänscht vunn alle rausgepickt.
Doch wie schunn erwähnt, het die liewer noch met em Ewwer ge.....schmust!*

*Die Wutz hot jo net gewuscht, was ehr bessert
unn is ganz brav in de Viehohänger maschert.
Am Schlachthaus ohkumm, hot die Wutz es Messer gesieh
Unn froht sich: Oh Mann, was geht?
Halle die mich vielleicht fer bleed?
Die wolle wisse wie ich aussieh, unn zwar vunn Inne.
Jetzt muß ich mache, daß ich Land gewinne.
Wo laaf ichen jetz hie? Am beschde Richdung Kreizung, do iss um die Zeit noch
kää Gewirr,
das wär jo de Hammer wenn ich mich in Roth noch veirr!
An de Kreizung hot se gebremst.
So, jetzt bin ich mo aus dänne ehre Finger drauß.
Bloß wo jetzt anne, no links, no rechts odder gradaus?
Do farre sinn Hegge, do kumme se mer net noh.
Unn schunn isse zwische de Heiser dorsch beim Hartmut in de Garde gefloh.*

*De Hartmut hot grad seine Pool gebutzt unn schdeht do ganz alää, wie veloss.
Im gleiche Moment kummt die Wutz quer unn mit dorschdrehende Hinnerfieß um
die Eck geschöß.*

*Ganz vedutzt schdeht de Hartmut do unn denkt:
 Wann die Sau jetzt ihre Arsch in meine frischgebutzte Schwimmingpool lenkt!
 Doch die Wutz is schlau unn iwwerleht: "Was issen daß fer e Loch,
 wann ich do ninnfalle kriense mich jo doch!"
 Mem e elegande Satz isse ums Hinnerniss rum.
 Oh Mann, ich glaab jetzt bin ich in e Sackgass kumm.
 De Sebastian kreischt:
 "Babba, Babba jetzt dreht se wirrer
 unn macht dodebei die ganze Blumebeete nirrer."*

*Beide schdehn se do unn gucke derer Wutz noch no,
 doch die hot die negschd Kurv net gried unn is freiweg in die Hegge gefloh.
 Dort hot se sich dann, völlig ungehemmt,
 zwische de Äschdcher unn de Dorne feschedgeklemmt.
 Wie de Reiner unn de Lui kumm sinn, hot se do gehockt ganz sammegekauert.
 Hoffentlich honn ich ne wänischens die Worscht vesauert.*

*Gedrigt unn gezoh honnse annrer, de Lui hinne, de Reiner vorne.
 So honnse se rausgriecht aus dänne Dorne.
 Ab ins Schlachthaus mit dir, du bleedes Vieh.
 Was mer aus dir mache, wärsche schunn sieh!*

*De Lui hot sich nom Schlachde gefrad, die Worsch war wie immer.
 Wie sollsen a annersched sinn.....noch schlimmer?*

*Die Musik schbeelt dänne Schlachter zur ehr,
 wenn so e Wutz net immer so bockisch wär!*

Schluß

Wie soll ich dem gude Stück jetz noch eh schenner Schluss vebasse?
 Das is schwer, das is faschd net se schaffe.
 Aaaach das werd äfach vesucht, das werd schun gelinge,
 wieso dann ah net, mer dun äfach irschend ebbes samme spinne.

Oh, was mer grad infallt ganz häß,
 ehr wisse jo noch gar net, wie unser Strauß dasjohr häßt:
 "Masi Paulaner" werd er diesmol gedaft.
 Guggen mol, wie er do hängt, so ganz brav.
 Un das Kerwedier do vorne, is das net scheh?
 Kenne ners net, das is als im Fernseh se seh.
 Basst das farblich net subber überein?
 Tja, mer sin halt im Reerer Jugendförderveein.
 So, getz froh ich noch, was unser Bojemeschder zu unserm Kerwestrauß
mähnt?

- - - Danke Edgar, das wollte mer here, dodenoh hon mer uns gesähnt.
 Mer sin widder tatkräfdisch unnerstützt wor, wie jedes Johr,
 un die Helfer läs ich jetzt grad mol noch vor:
 Bei unserm Rietz, bei demmer diesjohr ach widder durfte knibbele unsere
Strauß

un bei unserm Straußbub Liar, der hot geflocht die schöne Kerbcher in Saus
un braus.

Beim Eicher seim Vadder, vun dem mer de Bulldock widder benutze durfte
ah,

sunsch hätte mer kenne de Strauß aus em Wald uff de Schullere häm trah.
 Bei denne, die in unserer Kerwered Werwung gemach han bedanke mer uns
ach

Un selbschverständlich bei denne, die ischendwas fer uns gemach han iwwer
die Daach.

Die Kerwered gebts nadehrlich ah werrer se kaafe,
 dodefor misse ner nor an unsere Stand laafe.

Die Talbachmusikante spehle ach noch e paar Stunn,
 ehr sinn jo ach bestimmt noch net devunn.
 Alla, dann her ich mol uf un bis nächschd Johr,
 bis dahin, kreischd nommol de Olli vor.